



БОГ В ПОМОЩЬ

*МОЛИТВЫ ДЛЯ ЖИЗНИ,
ЗДОРОВЬЯ И СЧАСТЬЯ*



Таисия Степановна Олейникова
Бог в помощь. Молитвы для
жизни, здоровья и счастья

Текст предоставлен правообладателем

http://www.litres.ru/pages/biblio_book/?art=11828261

*Бог в помощь. Молитвы для жизни, здоровья и счастья. / Авт.-сост. Т.С. Олейникова.: Белый
город; Москва; 2009
ISBN 978-5-7793-1938-6*

Аннотация

Непрестанно молитесь – заповедовал нам апостол Павел (1 Фес. 5, 17). В горе и радости, беде или нужде мы всегда обращаемся к Богу с благодарственной или просительной молитвой. И Господь, по милости Своей, пошлет нам то, в чем мы нуждаемся: будь то здоровье, семейное благополучие или новое место работы. В этой книге собраны самые общие молитвенные обращения к Господу, Богородице, Небесным бесплотным силам, всем чинам святости, а также помещены молитвы в самых различных жизненных нуждах.

Содержание

Общие молитвы, тропари, кондаки и величания Господу, Божией Матери, святым угодникам Божиим и бесплотным небесным силам	4
Молитвы ко Господу Богу	4
Молитва Богу Отцу	4
Молитва Богу Сыну	5
Молитва Богу Духу Святому	5
Молитва Пресвятой Троице	5
Молитва иная Пресвятой Троице	6
Молитва первая ко Господу Иисусу Христу	6
Молитва вторая ко Господу Иисусу Христу	6
Молитва третья ко Господу Иисусу Христу	7
Молитва четвертая ко Господу Иисусу Христу	7
Молитва пятая ко Господу Иисусу Христу	7
Молитва шестая ко Господу Иисусу Христу	8
Молитва седьмая ко Господу Иисусу Христу	8
Молитвы Господу Иисусу Распятому	8
Молитва воскресшему Спасителю	9
Молитвы Иисусу Сладчайшему	10
Молитва ко Господу Богу	12
Молитва Всемилостивому Господу Иисусу	13
Молитва Святому Духу	13
Трисвятое	13
Молитва ко Пресвятой Троице	14
Молитва Господня	14
Символ веры	14
Молитва Честному Кресту	14
Молитвы ко Пресвятой Богородице	15
Молитва первая	15
Молитва вторая	15
Молитва третья	16
Молитва четвертая	16
Молитва пятая	16
Молитва шестая	16
Молитва седьмая	17
Молитва восьмая	18
Молитва девятая	18
Молитва десятая	19
Молитва одиннадцатая	19
Молитва двенадцатая	19
Молитва тринадцатая	20
Конец ознакомительного фрагмента.	21

Бог в помощь. Молитвы для жизни, здоровья и счастья

Автор-составитель Т.С. Олейникова

Общие молитвы, тропари, кондаки и величания Господу, Божией Матери, святым угодникам Божиим и бесплотным небесным силам

Молитвы ко Господу Богу

Молитва Богу Отцу

Всемогущий Владыко, Премудрый и Всеблагий Господи, Светоначального Сына Преподобный Родителю и Животворящего Духа Твоего вечный, присносущный Самоизводителью, Егоже величество неисчетно, слава несказанна, и милость безмерна. Благодарим Тя, яко воззвал еси нас от небытия и почтил еси драгоценным образом Твоим, яко даровал еси нам, недостойным, не точию познавати и любити Тя, но еже сладостнейше есть, и Отцем своим нарицати Тя.

Благодарим Тя, Боже милосердия и щедрот, яко преступивших заповедь Твою, не оставил еси нас посреде греха и сени смертныя, но благоволил еси Единородного Твоего Сына, Имже и веки сотворены суть, послати на землю нашего ради спасения, да, вочеловечением Его и страшными страданиями, мучительства диаволя и тли смертныя свободимся. Благодарим Тя, Боже любви и сил, яко, по вознесении на небо дражайшего Спасителя нашего, умолен быв Крестом Его, низпослал еси и Духа Твоего Пресвятаго на избранные Его ученики и апостолы, да, силою богодухновенных проповедей их, озарят весь мир нетленным светом Евангелия Христова. Сам убо, Человеколюбивый Владыко, услыши ныне смиренную молитву недостойных чад Твоих, да якоже создал еси нас за едину Твою благость, искупил еси ны за едино благоутробие Твое, тако и спасеши нас по единому безприкладному милосердию Твоему; зане от дел наших ниже следа спасения имамы, но чаяние праведных мести и отлучения от Пресветлаго лица Твоего; аще бо и о едином праздном глаголе взыскано будет в день суда и испытания, о неизчетных наших беззакониях, имиже согрешихом пред Тобою, кий, беднии, имамы воздати ответ? Сего ради весьма от дел наших отчаявшеся оправдания, ко Твоей единей, всяк ум и всяко слово превосходящей, прибегаем благодати, юже аки твердое основание надежды имуще, молим Тя: согрешихом, очисти, Господи! беззаконновою, прости, Владыко! прогневаю Тя, примирися, Долготерпеливе, и сохрани прочее: ум, совесть и сердце наше от скверн мирских, избави и спаси ны от многмятежных бури страстей и грехопадений, вольных же и невольных, ведомых и неведомых, и в тихое управи пристанище веры, любви и упования жизни вечныя. Помяни нас в милости Твоей, Господи, даруй нам вся, яже ко спасению, прошения, паче же чистое и безгрешное житие: сподоби нас любити Тя, и бояться от всего сердца нашего, и творити во всем волю Твою святую, молитвами Пречистыя Владычицы нашея Богородицы и всех святых Твоих, яко Благ и Человеколюбец Бог еси, и Тебе славу и благодарение и поклонение возсылаем, со Единородным Твоим Сыном, и со Пресвятым и Благим и

Животворящим Твоим Духом, ныне и присно и во веки веков. Аминь.

Молитва Богу Сыну

Единородне Сыне и Слове Божий, изволивый нашего ради спасения воплотитися и смерть претерпети, ныне же, и с пречистою плотию Твоею, на небесех на престоле со Отцем седяй и всем миром управляяй, не забуди милосердием Твоим нас, долу сущих и многими напастьми и скорбьми искушаемых, иже аще и весьма нечисти и недостойни есмы, но в Тебя, Спасителя и Господа нашего, веруем и иного Ходатая и надежды спасения не вемы. Подаждь, о Искупителю Всеблагий, да памятуем выну, коликих мучений души и тела Твоего потребно бяше, во еже удовлети за грехи наша вечной правде Отца Твоего, и како даже до ада со Креста низшел еси пречистою душею Твоею, да нас власти и мучительства адова свободиши: памятующе же о сем, да блюдемся от страстей и грехов, бывших виною лютых страданий и смерти Твоея, и да любим правду и добродетель, еже всякаго дара Тебе в нас приятнейше есть. Яко искушенный по всяческим, Сам веси, о Всеблагий, коль велика есть немощь духа и плоти нашея, а враг наш силен и злохитр, яко лев рыкая ходит, иский кого поглотити: не остави убо нас Своею всесильною помощию и буди с нами выну, храня и покрывая, наставляя и укрепляя, радуя и веселя дух наш. Мы же, на лоно любви и милосердия Твоего повергающесе, весь живот наш, временный и вечный, Тебе предаем, нашему Владыце, Искупителю и Господу, моляще из глубины души, да, имиже веси судьбами, сотвориши нам прейти безбедно мрачную жития сего земнаго юдоль и достигнути Богокраснаго чертога Твоего, егоже обещал еси уготовати всем, верующим во имя Твое и последующим Божественным стопам Твоим. Аминь.

Молитва Богу Духу Святому

Царю Небесный, Утешителю Всеблагий, Душе истины, от Отца предвечно исходяй и в Сыне выну почиваяй, независтный Источниче дарований Божественных, разделяя их коемуждо, якоже хочещи. Имже и мы, недостойнии, освятихомся и назнаменани есмы в день крещения нашего! Призри на молитву раб Своих, прииди к нам, вселися в ны и очисти души наша, да будем уготовани в жилище Пресвятыя Троицы. Ей, о Всеблагий, не возгнушайся наша нечистоты и ран греховных, но исцели я всеврачующим помазанием Твоим. Просвети наш ум, да разумеем суету мира и яже в мире, оживи нашу совесть, да неумолчно возвещает нам, яже подобает творити и яже отметати, исправи и обнови сердце, да не источает прочее день и ночь помышлений злых и желаний неподобных, укроти плоть и угаси росоносным дыханием Твоим пламень страстей, имже помрачается в нас драгоценный образ Божий. Духа праздности, уныния, любоначалия и празднословия отжени от нас, подаждь же нам духа любви и терпения, духа кротости и смирения, духа чистоты и правды, да, исправивше расслабленная сердца и колена, неленостно течем по пути заповедей святых, и тако, избегающе всякаго греха и исполняюще всяку правду, сподобимся улучшить кончину мирну и непостыдну, внити в Иерусалим Небесный и тамо поклонятися Тебе, купно со Отцем и Сыном, поюще во веки веков: Троице Святая, слава Тебе.

Молитва Пресвятой Троице

Пресвятая Троице, единосущная державо, всех благих вина! Что воздадим Тебе за вся, яже воздала еси нам, грешным и недостойным, прежде, неже на свет произыдохом, за вся, яже воздаеши коемуждо от нас по вся дни и яже уготовала еси всем нам в весте грядущем? Подобаше убо за толикия благодеяния и щедроты благодарити Тя, не словесы точию, но

паче дела, храняще и исполняюще заповеди Твоя: мы же, страдем нашим и злым обычаем
внемше, в безчисленные от юности низвергохомся грехи и беззакония. Сего ради, яко нечи-
стым и оскверненным, не точию пред Трисветлое лице Твое безстыдно явитися, но ниже
имене Твоего Пресвятаго изрещи довлеяше нам, аще бы не Ты Сама благоизволила во отраду
нашу возвестити, яко, чистыя и праведныя любящи, и грешники кающияся милуеши и благо-
утробне приемлещи. Призри убо, о Пребожественная Троице, с высоты святыя славы Твоея
на нас, многогрешных, и благое произволение наше вместо благих дел приими, и подаждь
нам духа истиннаго покаяния, да возненавидевше всякий грех, в чистоте и правде до конца
чистыми помыслы и благими деяньми славим сладчайшее и великолепое имя Твое. Аминь.

Молитва иная Пресвятой Троице

Всемогущая и Животворящая Святая Троице, и Светоначальная, яже всякую и премир-
ную тварь за едину благодать от не сущих приведый, и промысляя, и содержащи, иже по про-
чих Твоих неизреченных о земнем роде благодеяний, и покаяние нам ради плотскаго немо-
жения до смерти даровавый! Не остави нас, окаянных, в лукавых наших деяньих умрети,
ниже злоначальнику и завистцу, и губителю посмешество быти. Зриши бо, Благосерде, елик
убо онаго на нас навет и вражда, елико же и наше страствование, и слабость, и небрежение.
Но неоскудныя

Твоя благодати соделай на нас, молим на всякий день и час прогневающии Тя честных
и животворных заповедей преступлением. И вся убо всего прешедшаго живота нашего и
до нынешняго часа согрешенная нами в деяньих, или глагол а-ньих, или в помышлениях,
остави и прости. Сподоби же нас прочее скончати житие в покаянии и умилении и соблю-
дении святых Твоих повелений. Аще убо сладостию прельстившеся, многообразне согре-
шихом, или мерзкими похотьми, бесполезными и вредными, обольстившеся препроводихом;
аще гневом и яростию подвигшеся безсловесною, кого брата нашего оскорбихом; аще язы-
ком неизбежных и стропотных и крепких сетей обязахомся; аще коим чувств наших и всеми,
волею или неволею, ведуще или неведуще, от восхищения или поучения безумно попользо-
хомся; аще же лукавыми помыслы и суетными совесть осквернихом; аще ли коим другим
образом прегрешихом, от предприятия и обычая томими зело, прости нам и остави вся, Все-
щедре, Преблаже и Многомилостиве, и даруй нам прочее бодрость и силу, во еже творити
волю Твою, благу и благоугодну, и совершенну, да ношнаго и мрачнаго зла световидным
покаянием премошьсися, и яко во дни благообразно ходяще и очищени обявимся человеко-
любию Твоему недостойнии, воспевающе Тя и величающе во веки. Аминь.

Молитва первая ко Господу Иисусу Христу

Господи святыи, в вышних живый и на смиренныя призираый, и всевидящим оком
Твоим призираый на всю тварь! Тебе преклоняем колена душ и телес наших и молимся Тебе:
простри десницу Твою невидимую от святаго жилища Твоего, благослови люди Твоя, Тебе
молящияся и от Тебе великия и богатыя милости ожидающия, и, яко Благ и Человеколюбец,
дела рук наших исправи, даруя нам мирная и премирная благая Твоя. Яко Твое есть еже
миловати и спасати нас, и Тебе славу возсылаем, со Безначальным Твоим Отцем и Животво-
рящим Твоим Духом, ныне и присно и во веки веков. Аминь.

Молитва вторая ко Господу Иисусу Христу

Господи щедре и милостиве, долготерпеливе и многомилостиве! Услыши молитву
нашу и вонми гласу моления нашего, сотвори с нами знамение во благо, настави нас на путь

Твой, еже ходити во истине Твоей, возвесели сердца наша; во еже бояться имене Твоего святаго. Зане велий еси Ты и творяй чудеса, Ты еси Бог един, и несть подобен Тебе в бозех, Господи, силен в милости и благ в крепости, во еже помогати и утешати и спасати вся уповающия на имя святое Твое. Яко Бог милости и щедрот и человеколюбия еси, и Тебе славу возсылаем, со Безначальным Твоим Отцем и с Пресвятым и Благим и Животворящим Твоим Духом, ныне и присно и во веки веков. Аминь.

Молитва третья ко Господу Иисусу Христу

Благий Человеколюбче, премилосердый Господи, недуги наша понесый и ранами Твоими нас исцеливый! Пред Твоим величеством рабски припадающе, смиренно молимся: призи, Благосерде, на рабы Твоя, и якоже древле исцелил еси расслабленнаго, тридесять осмь лет в недуге своем лежавшаго, тако ныне, Целителю Благий, милостию и щедротами Твоими рабы Твоя посети. Ты убо расслабленному древле рекл еси: встань, возьми одр твой и ходи. Темже и мы, грешнии и недостойнии рабы Твои, на Божественныя Твоя словеса сия надеющиеся, пред Твоим же Величеством смиренно припадающе, Твое Божественное милосердие и неизреченное человеколюбие умильно просим: отверзи нам двери милости Твоея и прости вся согрешения наша вольная и невольная, имиже Твою благодать прогневахом и Твое человеколюбие раздражихом; уврачуй нашу болезнь греховную, недуги наша душевныя и телесныя во здравие претвори, немощи в силу преложи, печали в радость и скорби в утешение премени; отими от нас всякое уныние и забвение, ум наш укрепи и цел соблюди, во еже всегда в заповедех Твоих поучатися; вся уды наша исправи, во еже волю Твою благую и совершенную творити. Ты бо еси Целитель благий, Воздвижение немощным, болящим Врач, недужным Исцеление, здоровым здравия Хранитель, и Тебе славу возсылаем, со Безначальным Твоим Отцем и с Пресвятым и Благим и Животворящим Твоим Духом, ныне и присно и во веки веков. Аминь

Молитва четвертая ко Господу Иисусу Христу

Владыко Человеколюбче, Господи Иисусе Христе Боже мой, да не в суд ми будут Святая сия, за еже недостойну ми быти; но во очищение и освящение души же и тела, и во обручение будущия жизни и Царствия. Мне же, еже прилепятся Богу, благо есть, полагати во Господе упование спасения моего. Аминь.

Молитва пятая ко Господу Иисусу Христу

Благодарю Тя, Господи Царю всех, царствующаго небом и землею и преисподнею, благодарю Тя, Безначальне, Всесильне Царю Вседержителю, благодарю Тя, Преблагий Всемилолюбивый, Наставниче заблуждшим, на землю с небес сошедый и воплотивыйся от Девы Марии, нашего ради спасения, и бывый един Бог и Человек подобен мне, кроме страстей и всякаго греха, не привидением же, но истиною безстрастный неправедно от беззаконник пострадавый, да безстрастие мне осужденному за множество грехов моих подаси. Пою Твое неизреченное долготерпение, Господи; величаю неисповедимое смотрение Твое, славлю Твою безмерную милость, имиже преклонься, мене, осужденнаго, оправдал еси. Поклоняюся страстем Твоим, имиже аз безчестнейших пременихся страстей; лобызаю Твой Крест, имже мой грех осудил еси и от смертнаго осуждения мя свободил еси; лобызаю гвозди оныя, имиже клятвы потребил еси запрещение; целую язвы, имиже моего преслушания уврачеваша язвы. Целую трость, еюже подписал еси освобождение и еюже строптиваго змия уязвил еси главу; целую копие, мое рукописание растерзавшее и безсмертия источник отверзшее;

целую губу, напоенную отца и ко пречистым Твоим принесенную устом, еуже преслушания моего горькое во сладкое претворися. О неизмеримая глубино милосердия Твоего, Христе Спасителю наш! Темже смиренно со благодарением Ти припадаем, и Животворящему Твоему кресту, имже нас спасл еси от работы врагу, любезно кланяемся. Исповедуем, яко Ты еси един свят, един крепкий и един жизнодавец, и на всех имаши волю прикладну. Тобою, Господи, дается на диавола и на его воинство крепость, и Тебе славу возсылаем, со Безначальным Твоим Отцем, и с Пресвятым и Благим и Животворящим Твоим Духом, ныне и присно и во веки веков. Аминь.

Молитва шестая ко Господу Иисусу Христу

Владыко Христе Боже, Иже страстьми Своими страсти моя исцеливый и язвами Своими язвы моя уврачевавый! Даруй мне, много Тебе прегрешившему, слезы умиления; сраствори моему телу от обоняния Животворящаго Тела Твоего, и наслади душу мою Твоею Честною Кровию, от горести, еуже мя сопотивник напои; возвыси мой ум к Тебе, долу поникший, и возведи от пропасти погибели: яко не имам покаяния, не имам умиления, не имам слезы утешительныя, возводящая чада ко своему наследию. Омрачихся умом в житейских страстях, не могу воззрети к Тебе в болезни, не могу согретися слезами, яже к Тебе любви. Но, Владыко Господи Иисусе Христе, сокровище благих, даруй мне покаяние всецелое и сердце люботрудное во взыскание Твое, даруй мне благодать Твою и обнови во мне зраки Твоего образа. Оставих Тя, не остави мене; изыди на взыскание мое, возведи к пажити Твоей, и сопричти мя овцам избраннаго Твоего стада, воспитай мя с ними от злака Божественных Твоих Таинств, молитвами Пречистыя Твоея Матере и всех святых Твоих. Аминь.

Молитва седьмая ко Господу Иисусу Христу

Господи Иисусе Христе, Боже мой, посещай тварь Свою, Емуже явлены страсти моя и немощь естества нашего человеческого и крепость супостата нашего! Ты

Сам покрый мя от злобы его, зане сила его крепка, естество же наше страстно и сила наша немощна. Ты убо, о Благий, ведый немощь нашу и носяй неудобство безсилия нашего, сохрани мя от смущения помыслов и потопа страстей, и достойна сотвори мя службы Твоея святыя, да не како в страстях моих растлю сладость ея, и обращуся беззастуден пред Тобою и дерзостив. Господи, пресладкий мой Иисусе, помилуй и спаси мя. Аминь.

Молитвы Господу Иисусу Распятому

Молитва первая

На кресте пригвожденный за ны, Иисусе Христе, Единородный Бога Отца Сыне, милости, любви и щедрот неисчерпаемая бездно! Вем, яко грехов ради моих, от неизреченнаго человеколюбия, кровь Твою пролияти на кресте изволил еси, юже аз, окаянный и неблагодарный, доселе скверными моими делы попирах и нивчтоже вменях. Тем убо из глубины беззакония и нечистоты моя умныма очима на распятаго

Тя на кресте Искупителя моего воззрев, со смирением и верою во глубину язв, Твоего милосердия исполненных, себе повергаю, грехов прощения и сквернаго жития моего исправления прося. Милостив буди мне, Владыко и Судие мой, не отрини мя от лица Твоего, но всеильною Твоею рукою Сам мя к Тебе обрати и на путь истиннаго покаяния настави, да отныне положу спасения моего начало. Божественными страданьями Твоими укроти моя

плотския страсти; излианною Твоею кровию очисти моя душевныя скверны, распятием Твоим распни мя миру с его соблазнами и похотьми; крестом Твоим огради мя от невидимых враг, ловящих душу мою. Прободенными ногами Твоими от всякаго пути лукаваго возбрани ногам моим; прободенными руками Твоими руце мои от всякаго неугоднаго Тебе дела удержи. Пригвожденный плотию, пригвозди страху Твоему плоть мою, да уклонився от зла, творю благо пред Тобою. Преклонивый главу Твою на кресте, к земли смирения преклони вознесенную мою гордыню; венцем Твоим терновым огради моя ушеса, во еже не слышати неполезнаго; желчь устами вкусивый, положи хранение нечистым устом моим; отверстое копием имей сердце, сердце чисто во мне созижди; всеми Твоими язвами, всего мя сладце в любовь Твою уязви, да Тебе, Господа моего, возлюблю всею душею, всем сердцем, всею крепостию и всем помышлением. Дажь ми Себе странна и неимуща где главы поклонити; даждь ми Себе Всеблагаго, избавляющего душу мою от смерти; даждь мне Себе Всесладкаго, услаждающего мя в скорбех и напастех Своею любовию, да Егоже первее ненавидах, прогневлях, от себе изгонях и ко кресту пригвождах, сего ныне возлюблю, радуясь прииму и сладце крест Его до конца жизни моя понесу. Не даждь отселе, о Всеблагий Искупителю мой, не единой моей воли совершатися, понеже зла есть и непотребна, да не паки впаду в тяжкую работу царствовавшего во мне греха, но Твоя воля благая, спасти мя хотящая, да совершается во мне всегда, ейже мя вручая, Тебе распятаго Господа моего умным очесем моего сердца представляю и молю из глубины души, да и в разлучении моем от брэннаго моего тела, Тебе единаго на кресте Твоем узрю, в руце мя защищения Своего приемлюща и от воздушных духов злобы храняща, вселяюща же со грешники, покаянием Тебе благоугодившими. Аминь.

Молитва вторая

Господи Иисусе Христе, Сыне Бога Живаго, Творче неба и земли, Спасителю мира! Се аз, недостойный и паче всех грешнейший, смиренно колена сердца моего пред славою величества Твоего преклонив, воспеваю крест и страдания Твоя, и благодарение Тебе, Царю всех и Богу, приношу, яко благоизволил еси вся труды и всякия беды, напасти и мучения, яко человек понести, да всем нам во всяких печалех, нуждах и озлоблениях состраждущий Помощник и Спаситель будеши. Вем, Всесильне Владыко, яко вся сия Тебе убо не быша потребна, но человеческого ради спасения, да всех нас искупиши от лютыя работы вражия, крест и страдания претерпел еси. Что убо воздам Тебе Человеколюбче, о всех, яже пострадал еси мене ради грешнаго? Не вем, душа бо и тело и вся благая от Тебе суть, и вся моя Твоя суть, и аз Твой есмь. Точию на безчисленное Твое, Благоутробне Господи, милосердие надеяся, пою Твое неизреченное долготерпение, величаю неисповедимое истощание, славлю Твою безмерную милость, поклоняюся пречистым страстем Твоим, и вселюбезно лобызая язвы Твоя, вопию: помилуй мя, грешнаго, и сотвори, да не бесплоден будет во мне Крест Твой святой, да причащаяся zde с верою страданием Твоим, сподобилюся видети славу Царствия Твоего на небеси! Аминь.

Молитва воскресшему Спасителю

Слава Тебе, Господи Иисусе Христе, Боже мой, яко паки сподобил мя еси недостойнаго, прешедша поприще святаго поста, поклонитися Божественным страстем Твоим и видети всерадостный день преславнаго из гроба воскресения Твоего, вонже свободил еси сущия во аде от век связанныя души праведных. Тоя божественныя свободы духа и плоти дражайший Спасителю мой, и аз желаю, да разреши мя, связана суца многими грехи, и да сотвориши возсияти живоносному свету воскресения Твоего во мрачней души моей; вижу

бо безчисленныя щедроты и неизреченное человеколюбие Твое, яко не точию от небытия в бытие мя привел еси, и образа Твоего подобием украсив, вся дольняя твари владыку поставил мя еси, но и посем падша с высоты и врагу поработившася, не оставил еси, но, искупив мя безценною кровию Твоею, благодатию крещения снабдил мя еси, да востеку на первое достояние. Аз же, окаянный, запят быв умом плотским, обратихся вспять и паки раб сотворихся греха и страстей, донележе един по единому погубих вся дары благодати Твоея. И ныне убо, что сотворю, не вем; обаче помянув глаголы пречистых уст Твоих, яко не пришел еси призвати праведники, но грешники в покаяние, и аз, яко един от сих, с верою и смирением прихожду к живоносному гробу Твоему, не ароматы и воню мира носяй (наг бо есмь и пуст благих дел), но паче надежду имый обрести в нем прощение грехом моим и обновление нечистому житию моему. Призри убо на мя кающася и служи ти Тебе хотяща, и не отрини от благодати воскресения Твоего! Живоносною смертию Твоею и погребением умертви моя лютыя страсти, да, яко мертв и погребен, живу в мире сем. Преславным востанием Твоим воздвигни мою душу, умерщвленную грехи, и оживи совесть, еяже ничтоже в мире нужнейше есть. Вознесением Твоим отторгни мя от суетных и душегубных благ земных, и сотвори мя горняя мудрствовати, яко да не ктому себе живя и угождая, но Тебе, Господу и Богу моему, служа и работая, якоже сподобихся поклонитися воскресению Твоему на земли, тако сподоблен буду видети Тебе, дражайшаго Искупителя моего, и на небеси, за приятие смерти крестныя славою и честью венчана, и став одесную величества Твоего, со Архангелы и Ангелы, и со всеми искупленными Тобою братьями моими, во веки веков пою Тебе: Аллилуиа. Аминь.

Молитвы Иисусу Сладчайшему

Молитва первая

Согреших, беззаконновах и не оправдихся пред Тобою, Преблагий Владыко, преступих спасительныя Твоя заповеди и священные обеты моя, яже во святом крещении пред святым Твоим жертвенником, пред Ангелы же и человеки сотворих; преобидех честную кровь завета Твоего, еюже освятихся, общение искупления прием: дух благодати обезчестих, страшнаго же и преестественнаго сыноположения небрегох; всякое писание, Божественный закон и учение Богодухновенное, ударения воздуха тщя, и вещания едина токмо деяний пустая во мне вменишася; именем токмо и словесы честное Евангелие истиннаго христианства окаянный содержу; руце имам ко всякому хищению и лихоимству прилежны; нозе же скоро и дерзостно ко всякой неправде зле текущая, готовы часть братнюю восхищати и попирати, снедающе убогих; уста священных молитв и слова Божия орган, всякия нечистоты, суесловия и клятвопреступления, бесом сотворих во орган; очи и вся моя чувства, блужения и всякаго сквернения премножеством исполних; во мне царствующаго ума Божественное благодати семя поправ, и уды Твоя, Христе, блудничи уды сотворив, вместо храма Божия, тли и всякия нечистоты хранилище обретохся.

Сего ради, Преблагий Владыко, многое Твое человеколюбие в стужение претворих окаянный, и многая Твоя благая дарования, в казнь безумно мне преложих; отнюдуже ниже от сущих ми благих, ниже от болезней ближних лучший быв, праведно на мя сам Твоего праведнаго наказания язвы подвигох. Но не яростию Твоею обличи мя, ниже гневом Твоим накажи мя, Господи. Тебе единому согреших, но Тебе единому и поклоняюся, и сокрушенным сердцем, яко жертву чистую, исповедание Ти приношу: ослаби, Человеколюбче Владыко, остави праведно наносимую рану, да победит множество щедрот Твоих, грехов моих лукавое собрание, и Твоя безчисленныя благости пучина да покрывает горькое слез моих море. Имам в

руках Твоего человеколюбия образ и величество: разбойника, мытаря, блудницу и блудного сына, иже вси паче мене в покаянии благоискусствующе, в Небесное Царство предвзыдоша. С ними убо и мене исповедающася и припадающа Ти приими, Владыко; аще же и тех всяческаго обращения и покаяния множества отстою, недоставшее да исполнит безмерная благодать Твоя, паче же и все, понеже и всего воистину отстою. Приношу Ти рыдание убогих и гласы младенца, смиренную и препростую, всякаго возраста молящихся часть, достойную щедрот и прощения Твоего. Имаши к сему на милосердие и милость преклоняющия Тя крест и вольную смерть, юже за мя неблагодарнаго претерпел еси, подвиги к тому апостолов, преподобных, постников и мучеников крови; пред всеми же общую всех надежду и спасение, паче слова без семени Рождшую Тя; ихже мольбы человеколюбно приемши, услыши мя, Иисусе Сладчайший, молящаготися, и ниже токмо о мне самом, но и о нихже должен есмь; воинству и всей державе даруй на супостаты победу. Заблуждшия же от Православныя веры еретики и отступники к познанию истины призиви, неверныя просвети, да Тя уведят; грешныя к покаянию приведи, девствующим чистоту и воздержание даруй, брачным святыню, вдовицам и сирым буди воспитание, нищим покров, странствующим возвращение, плавающим пристанище, кающимся прощение даруй, плачущим утешение, благим во благодати пребывати, средним лучшими быти, согрешающим во исправление приходити. Ей, Иисусе Сладчайший, молютися: даждь грехом моим оставление, ума благопостояние, тела здравие, житию нуждая довольная, мир во днех моих, воздуха благорастворение, земли благоплодие, веры Православныя возвращение, и соединение святых Твоих церквей, низложение ересей, советов нечестивых разорение, огонь любве и всякаго благочестия, в молитве чистоту сердечную, в заключении терпение и великодушие, в надежди веселие и всякое душевному моему и телесному здравию и спасению полезное, паче же великолепей Твоей славе подобающее прошение даруй, и исполни по неизмерным щедротам Твоим, избавляя мя належащаго праведнаго прещения, губительства, труса, потопа, огня, меча и всякия смертоносныя язвы; и не хотяй смерти грешника, даруй ми время ко покаянию, яко да и настоящих зол и будущих вечных мук свободюся, благодатию и человеколюбием Безначальнаго Твоего Отца, с Нимже благословен еси, со Пресвятым, Благим и Животворящим Твоим Духом, ныне и присно и во веки веков. Аминь.

Владыко Господи Иисусе Христе, Боже мой, Иже неизреченнаго ради Твоего человеколюбия, на конец веков во плоть оболкийся от Приснодевы Марии, славлю о мне Твое спасительное промышление раб Твой, Владыко; песнословлю Тя, яко Тебе ради Отца познах, благословлю Тя, Егоже ради и Дух Святой в мир прииде, поклоняюся Твоей по плоти Пречистой Матери, таковой страшной тайне послужившей, восхваляю Твоя ангельская ликостояния, яко воспеватели и служители Твоего величества; ублажаю Предтечу Иоанна, Тебе крестившаго, Господи; почитаю и провозвестившия Тя пророки, прославляю апостолы Твоя святых; торжествую же и мученики, священники же Твоя славлю; поклоняюся преподобным Твоим, и вся Твоя праведники пестунствую. Таковаго и толикаго многаго и неизреченнаго лика божественнаго в молитву привожду Тебе, Всещедрому Богу, раб Твой, и сего ради прошу моим согрешением прощения, еже даруй ми всех Твоих ради святых, изряднее же святых Твоих щедрот, яко благословен еси во веки. Аминь.

Молитва третья

Тебе, Господи, единому благому и непамятозлобному, исповедаю грехи моя, Тебе припадаю, вопия, недостойный: согреших, Господи, согреших, и несмь достоин воззрети на высоту небесную, от множества неправд моих. Но, Господи мой, Господи, даруй ми слезы умиления, Единый Блаже и Милостивый, яко да ими Тя умолю очиститися прежде конца от всякаго греха; страшно бо и грозно место имам проити, тела разлучився, и множество мя

мрачное и безчеловечное демонов срящет, и никтоже в помощь спутствуяй, или избавляяй. Тем припадаю Твоей благости, не предаждь обидящим мя, ниже да похвалятся о мне врази мои, Благий Господи, ниже да рекут: в руки наша пришел еси и нам предан еси. Ни, Господи, не забуди щедрот Твоих, и не воздаждь ми по беззаконием моим, и не отврати лица Твоего от мене, но Ты, Господи, накажи мя, обаче милостию и щедротами, враг же мой да не возрадуется о мне, но угаси его на мя прещения, и все упраздни его действо, и даждь ми к Тебе путь неукорный, Благий Господи, занеже и согрешив не прибегах к иному врачу и не прострох руки моя к богу чуждему. Не отрини убо моления моего, но услыши мя Твоею благостию, и утверди мое сердце страхом Твоим; и да будет благодать Твоя на мне, Господи, яко огонь попадаяй нечистыя во мне помыслы, Ты бо еси, Господи, свет паче всякаго света; радость, паче всякия радости; упокоение, паче всякаго упокоения; жизнь истинная и спасение пребывающее во веки веков. Аминь.

Молитва ко Господу Богу

Господи, согрешихом на небо и пред Тобою! Приими обращение и покаяние наше, приими наше стенание и слезы, приими покаяние нас, грешных, приими рыдание и вопль наш даже до смерти. Приими нас, окаянных, живших безстыдно; приими нас, Человеколюбче, зело прогневавших Тя, приими нас, Владыко, проведенных всю жизнь в распутстве, во всяком лукавствии и нечистоте, приими нас, Господи Боже, преступивших заповеди Твоя, приими нас, Владыко, недостойных раб Твоих, и не воздай нам по делом рук наших. Исповедаем Тебе, Владыко, яко по грехом нашим несмы достойни даже и жизни; исповедаем, Господи, яко несмы достойни даже воззрети на солнце сие, зане несть таков грех, несть ни едино таково злодеяние, егоже не совершили быхом мы окаянии. Но приими нас, Господи, якоже блуднаго сына, приими якоже разбойника, приими яко блудницу и мытляря. Господи, обрати нас! Господи, вразуми нас и не прогневайся на нас, но буди милостив ко грехом нашим! Ты еси Бог наш, и и разве Тебе иного не знаем. Господи, исторгни нас от враг наших и не вниди в суд с рабы Твоими. Господи, Ты еси Бог, и мы людие Твои. Согрешихом, содеяхом беззаконие и неправду, сотворихом зло, погрешихом во всем, не послушахом заповедей Твоих, и того ради далече, уклонихомся от Тебе. Но помилуй, Господи, дела рук Твоих; помилуй, Владыко, тыя, иже хитростию змия изгнани быша из рая; помилуй нас и облецы нас в хитон веселия и одежду спасения; помилуй нас, ихже диавол лишил ест помощи Твоея. Милосерде, помилуй тыя, иже оставиша Тя и служажу ему; помилуй заблудшия, помилуй не сохранивших заповедей Твоих и следовавших злодеянием демонов; помилуй осквернивших себе грехми, помилуй тыя, иже пребывают под властью диавола, помилуй осквернившихся распутством. Помилуй, Милосерде, помилуй, Блаже, помилуй, Долготерпеливе, зане руки наша совершиша всякое зло, всякое осквернение, любостяжание и неправду. Осквернихом душу, яже создал еси по образу Твоему, осквернихом тело, осквернихом чувство. Язык наш явился якоже меч остр, направлен противу ближняго, очи наши исторгают пламень, руки наша полны крове, ноги наша скоры на совершение зла, уста наша осквернена злословием, и, кратко рещи, осквернихом и землю и воздух. Воистину неправедная дела наша доидоша даже до небесе, хищения наша превысиша горы, любостяжание превыси облака, пороцы наши достигоша небесе, греси наши суть непростительни, преступления наша не имут извинения, прегрешения наша суть неисправима, и се земля не может понести наших злодеяний. Темже, Господи, нужду имама в милосердии Твоем. Ты веси немощь естества нашего, помилуй, Господи, творение рук Твоих. Се зываем к милосердию Твоему: не лиши нас помощи Твоея, низпосли нам, недостойным, милость Твою, даруй нам, грешным, заступление Твое, яви нам лице Твое, и спасемся. Аминь.

Молитва Всемилоствому Господу Иисусу

Благий Человеколюбче, Премилосердый Господи, недуги наша понесый и ранами Твоими нас исцеливый! Пред Твоим величеством рабски припадающе, смиренно молимся: призи, Благосерде, на рабы Твоя, и якоже древле исцелил еси расслабленнаго, тридесять осмь лет в недуге своем лежавшаго, тако и ныне, Целитель Благий, милостию и щедротами Твоими рабы Твоя посети. Ты убо расслабленному древле рекл еси: востани, возьми одр твой и ходи. Темже и мы, грешнии и недостойнии рабы Твои, на божественная Твои словеса сия надеюшеся, пред Твоим же величеством смиренно припадающе, Твое божественное милосердие и неизреченное человеколюбие умильно просим: отверзи нам двери милости Твоея и прости вся согрешения наша вольная и невольная, имиже Твою благодать прогневахом и Твое человеколюбие раздражихом; уврачуй нашу болезнь греховную, недуги наша душевныя и телесныя во здравие претвори, немощи в силу преложи, печали в радость и скорби во утешение премени, отими же от нас всякое уныние и забвение; ум наш укрепи и цел соблюди, во еже всегда в заповедех Твоих поучатися; вся уды наша исправи, во еже волю Твою благую и совершенную творити. Ты бо еси Целитель Благий, воздвижение немощным, болящим врач, недужным исцеление, здоровым здравия хранитель, и Тебе славу возсылаем, со Безначальным Твоим Отцем, и с Пресвятым и Благим и Животворящим Твоим Духом, ныне и присно и во веки веков. Аминь.

Тропарь, глас 4

С вышних призирая, убогия приемля, посети нас, озлобленныя грехи, Владыко Всемилоствиве, молитвами Богородицы даруй душам нашим велию милость.

Ин тропарь, глас 4

Светильниче солнечный, Всемилоствивый Спасе, просвещением сияния Твоего подай и нам слово, да восхвалим чистою совестью Твое пребожественное празднество, Тебе же, Единороднаго Сына, единосущна с Духом, славяще, даруеши бо нам мир и велию милость.

Кондак, глас 4

Всякия скверны, Всемилоствиве Спасе, аз бых делатель, и во отчаяния ров впадся, но стену от сердца и вопию к Тебе, Слово: ускори, Щедрый, и потщися на помощь нашу, яко Милостив.

Молитва Святому Духу

Царю Небесный, Утешителю, Душе истины, Иже везде сый и вся исполняй, Сокровище благих и жизни Подателю, прииди и вселися в ны, и очисти ны от всякия скверны, и спаси, Блаже, души наша.

Трисвятое

Святыи Боже, Святыи Крепкий, Святыи Безсмертный, помилуй нас (*читается трижды, с крестным знаменем и поясным поклоном*).

Молитва ко Пресвятой Троице

Пресвятая Троице, помилуй нас; Господи, очисти грехи наша; Владыко, прости беззакония наша; Святыи, посети и исцели немощи наша, имене Твоего ради. Господи, помилуй (*трижды*).

Слава Отцу и Сыну и Святому Духу, и ныне и присно и во веки веков. Аминь.

Молитва Господня

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго. Аминь.

Символ веры

Верую во единого Бога Отца, Вседержителя, Творца небу и земли, видимым же всем и невидимым. И во единого Господа Иисуса Христа, Сына Божия, Единородного, Иже от Отца рожденного прежде всех век; Света от Света, Бога истинна от Бога истинна, рожденна, несотворенна, единосущна Отцу, Имже вся быша. Нас ради человек и нашего ради спасения сшедшаго с небес и воплотившагося от Духа Свята и Марии Девы, и вочеловечшася. Распятого же за ны при Понтийстем Пилате, и страдавша, и погребенна. И воскресшаго в третий день по Писанием. И возшедшаго на небеса, и седяща одесную Отца. И паки грядущаго со славою судити живым и мертвым, Егоже Царствию не будет конца. И в Духа Святаго, Господа Животворящаго, Иже от Отца исходящаго, Иже со Отцем и Сыном спокланяема и сславима, глаголавшаго пророки. Во едину Святую, Соборную и Апостольскую Церковь. Исповедую едино крещение во оставление грехов. Чаю воскресения мертвых и жизни будущего века. Аминь.

Молитва Честному Кресту

Да воскреснет Бог, и расточатся врази Его, и да бежат от лица Его ненавидящий Его. Яко исчезает дым, да исчезнут; яко тает воск от лица огня, тако да погибнут беси от лица любящих Бога и знаменующихся крестным знамением, и в веселии глаголющих: радуйся, Пречестный и Животворящий Кресте Господень, прогоняй бесы силою на тебе пропятаго Господа нашего Иисуса Христа, во ад сшедшаго и поправшаго силу диаволу, и даровавшаго нам тебе Крест Свой Честный на прогнание всякаго супостата. О Пречестный и Животворящий Кресте Господень! Помогай ми со Святою Госпожею Девею Богородицею и со всеми святыми во веки. Аминь.

Молитвы ко Пресвятой Богородице

Молитва первая

О Пресвятая Госпоже Владычице Богородице! Вышши еси всех Ангел и Архангел и всея твари честнейши, помощница еси обидимых, ненадеющихся надеяние, убогих заступница, печальных утешение, алчущих кормительница, нагих одеяние, больных исцеление, грешных спасение, христиан всех поможение и заступление. О Всемилостивая Госпоже, Дево Богородице Владычице! Милостию Твоею спаси и помилуй страну нашу, преосвященные митрополиты, архиепископы и епископы, и весь священнический и иноческий чин, военачальники, градоначальники и христоролюбивое воинство, и доброхоты, и вся православныя христиане ризою Твоею честною защити, и умоли, Госпоже, из Тебе без семени воплотившагося Христа Бога нашего, да препояшет нас силою Своею свыше на невидимыя и видимыя враги наша. О Всемилостивая Госпоже Владычице Богородице! Воздвигни нас из глубины греховныя, и избави нас от глады, губительства, от труса и потопа, от огня и меча, от нахождения иноплемennых и междоусобных брани, и от внезапных смерти, и от нападения вражия, и от тлетворных ветр, и от смертоносных язвы, и от всякаго зла. Подаждь, Госпоже, мир и здравие рабом Твоим, всем православным христианом, и просвети им ум и очи сердечныя, еже ко спасению, и сподоби ны, грешныя рабы Твоя, Царствия Сына Твоего, Христа Бога нашего, яко Держава Его благословена и препрославлена, со Безначальным Его Отцем и с Пресвятым и Благим и Животворящим Его Духом, ныне и присно и во веки веков. Аминь.

Молитва вторая

Нескверная, неблазная, нетленная, пречистая, чистая Дево, Богоневесто Владычице, яже Бога Слова человеком преславным Твоим рождеством соединившая, и отринувшееся естество рода нашего небесным совокупльшая, яже ненадежных едина надеждо и боримых помощи, готовое заступление к Тебе притекающих, и всех христиан прибежище! Не гнушайся мене, грешнаго, сквернаго, скверными помыслы и словесы и деяньми всего себе непотребна сотворша, и разумом лености сластей жития раба бывша. Но яко человеколюбиваго Бога Мати, человеколюбне умилосердися о мне, грешнем и блуднем, и приими мое еже от скверных устен приносимое Тебе моление; и Твоего Сына и нашего Владыку и Господа, Матернее Твое дерзновение употребляюще, моли, да отверзят и мне человеколюбныя утробы Свояя благодати, и презрев моя безчисленная прегрешения, обратят мя к покаянию, и Своих заповедей делателя искусна явит мя. И предстани мне присно, яко милостивая и милосердая и благолюбивая, в настоящем убо житии теплая предстательница и помощница, сопротивных нашествия отгоняюще, и ко спасению наставляюще мя, и во время исхода моего окаянную мою душу соблюдающе, и темная зраки лукавых бесов далече от нея отгоняюще, в страшный же день суда вечныя мя избавляюще муки, и неичреченныя славы Твоего Сына и Бога нашего наследника мя показующи; юже и да улучу, Владычице моя, Пресвятая Богородице, Твоим ходатайством и заступлением, благодатию и человеколюбием Единороднаго Сына Твоего, Господа и Бога и Спаса нашего Иисуса Христа, Емуже подобает всякая слава, честь и поклонение, со Безначальным Его Отцем и

Пресвятым и Благим и Животворящим Его Духом, ныне и присно и во веки веков. Аминь.

Молитва третья

Приими, Все благомогущая, Пречистая Госпоже, Владычице Богородительнице, сия честныя дары, Тебе единой прикладным, от нас, недостойных рабов Твоих, от всех родов избранная, всех тварей небесных и земных вышшая являющаяся. Понеже бо Тебе ради бысть Господь сил с нами, и Тобою Сына Божия познахом, и сподобихомся Святаго Тела Его и Пречистыя Крове Его. Темже блаженна еси в родех родов, Богоблаженная, Херувимов светлейши и Серафимов честнейши сущая. И ныне, Всепетая Пресвятая Богородице, не престай молящися о нас, недостойных рабах Твоих, еже избавитися нам от всякаго совета лукаваго и от всякаго обстояния, и сохранитися нам неврежденным от всякаго ядовитаго прилога дьявольскаго. Но даже до конца молитвами Твоими неосужденных нас соблюди, яко да Твоим заступлением и помощью спасаеми, славу, хвалу, благодарение и поклонение за вся в Троице Единому Богу и всех Создателю возсылаем, ныне и присно и во веки веков. Аминь.

Молитва четвертая

Пресвятая Владычице моя Богородице! Святыми Твоими и всеильными мольбами отжени от мене, смиреннаго и окаяннаго раба Твоего, уныние, забвение, неразумие, нерадение, и вся скверная, лукавая и хульная помышления от окаяннаго моего сердца и от помраченнаго ума моего, и погаси пламень страстей моих, яко нищ есмь и окаянен. И избави мя от многих и лютых воспоминаний и предприятий, и от всех действий злых свободи мя. Яко благословена еси от всех родов, и славится пречестное имя Твое во веки веков. Аминь.

Молитва пятая

Царице моя преблагая, надеждо моя Богородице, прибежище сирых и странных предстательнице, скорбящих радости, обидимых покровительнице! Зриши мою беду, зриши мою скорбь, помози ми яко немощну, направи мя яко странна. Обиду мою веси, разреши ту, якоже волиши: яко не имам иныя помощи разве Тебе, ни иныя предстательницы, ни благия утешительницы, токмо Тебе, о Богомати, яко да сохраниши мя и покрыеши во веки веков. Аминь.

Молитва шестая

К Тебе, Пречистой Божией Матери, аз, окаянный, припадая, молюся: веси, Царице, яко непрестанно согрешаю и прогневляю Сына Твоего и Бога моего. И аще многажды каюся, ложь пред Богом обретаюся: каюся трепеща, да не како поразит мя Господь, и по часе мале паки таяжде творю. Ведущи сия, Владычице моя, Госпоже Богородице, молю, да помилуеши, да укрепиши мя, и благая творити да подаси ми. Ты веси, о Владычице моя Богородице, яко имам в совершенней ненависти злая моя дела и всею мыслию люблю закон Бога моего. Но не вем, Госпоже Пречистая, откуда яже ненавижду, тая творю, а благая преступаю. Не попускай убо, Пречистая, воли моей совершатися, неуютна бо есть, но да будет во мне воля Сына Твоего и Бога моего, да мя спасет, и вразумит, и подаст ми благодать Святаго Духа, да бых аз отселе престал сквернодействуя и прочее пожил бых в повелениях Сына Твоего, Господа нашего Иисуса Христа, Емуже подобает всякая слава, честь и поклонение, со Безначальным Его Отцем, и Пресвятым и Благим и Животворящим Его Духом, ныне и присно и во веки веков. Аминь.

Молитва седьмая

Нескверная, Неблазная, Нетленная, Пречистая Богородице, Пренепорочная Владычице, Небесная Царице, Мати Царя вышних сил, Творца небесе и земли, едина радости Ходатаице всему миру, рождающая Господа нашего Иисуса Христа, земным всем Спасителя! Вопию Ти припадая: прими молебное сие пение благодарственное от недостойного раба Твоего и от скверных устен моих, не презри мене, Всегосподованная Царице. Ибо никтоже претекаяя к Тебе посрамлен бысть, или кто призывая Тя не услышан от Тебе изыде; яко вся стихии, небо и земля, воздух и море повинуются Тебе, и вси противни дуси страхом обдержими трепещут, боящися имене святаго Твоего, ведуще Тя Матерь Божию. Кто паки надежду возложивый на Тя погибе? Точию отметающися поклонятся образу Твоему написанному, егоже вся силы небесныя чтут, вся же колена земная, христианский род и всяк возраст верных, славословяще поклоняемся, Пречистая, благоговейно почитающе. Не имамы бо инаго Бога, разве Сына Твоего, со Отцем присно и Духом Святым, во Единем Божестве, от всея твари славимаго и поклоняемаго, и Тебе по Господе Бозе Госпожу Богородицу исповедуем, истиннаго Бога нашего Матерь, и любезно вси почитаем, Госпоже. Милостива убо нам Сына Твоего сотвори, паче же покажи на мне обычное Твое милосердие, можеша бо, елика хоцещи: умоли о мне, яко удалихся от Него за безчисленная и скверная беззакония моя, и толико прогневах милосердие Его, и огорчих человеколюбную Его благодать и многое милосердие и милость, яко несмы достоин от Него помилован быти, аще не Ты умилостивиши Его о мне, Госпоже Царице и Богомати, яко вся Тебе от Него возможна суть. Сего ради к Тебе прибегаю, теплой Помощнице и скорей Заступнице, не имам бо иныя разве Тебе к Нему Ходатаицы. Ей, Царице, моя Владычице, Пречистая Госпоже Богородице, несть ми инаго высочайшаго на земли и на небеси, якоже Ты по Господе Бозе моем Иисусе Христе, и на Тя всю мою надежду имам, Пречистая Дево. Темже на Твой пресвятыи образ взирая, яко истинную Самую Тя зрю Богородицу, верую сердечною и любовию от души припадая, поклоняюся Тебе с Превечным на руку Твою держимым Младенцем, Господем нашим Иисус Христом, боголепно почитая, и молебная пения и молитвы принося Ти, ужасаюся, и трепещу за недостойнство мое, и вопию Ти: помилуй мя, Мати Божия, и покажи на мне убозем древняя милости Твоя. Якоже иногда древле всемогущим Твоим воеводством спасла еси царствующий град Твой от скифскаго воеводы зверообразнаго, лукаваго вепря, предстателя бесов, онаго прегордаго кагана, и разсвирепещущим морем тьмочисленная воинства потопила еси, вопиющая и нападающая на град Твой; и паки, с небесе одождием горящих камык, тьмы кораблей в мори бредущем развари еси; и ныне, едина Богомати, едина Ты таяжде суши, яви на мне человеколюбное Твое заступление. Победи невидимым полки сатанины, душевный мой град распленившия, и царствующую душу мою в нем стрелою беззакония уязвившия, и всего мя мечми злодейства изсекшия, и греховным копием прободшия; ибо еле жива оставиша, и в рове греховнем затвориша мя нечувствия, и окаменение сердечное наложиша ми, яко едва ощущаюся, не могый от порабощения тех свободитися. Но к Тебе Матери Господа моего рыданием слез зову: предстани ми в помощь скоро, да не до конца погибну, исхити мя из руки тех, и извлецы мя из греховнаго рова, возстави паки душевный мой град, и ума владыку в нем воцари, и над всеми чувства укрепил, неприступна и страшна врагом покажи; да вси уведят, яко Тобою содержимь есмь. Спасаящи спаси, Владычице Дево, душу мою, якоже Твой град иногда, на Тя уповающий, спасла еси, на славу и заступление верным, на посрамление же нечестивым, и во веки на безконечное их мучение, на величие же и похвалу от рода в роды правоверному христианскому роду. Темже Твою помощь проповедую велегласно, и онаго Твоего великаго заступления страшное воеводство воспоминаю, Тебе Избранной Воеводе победительная воспую раб Твой, Богородице, и молебное сие акафистово приношу благодарение: прими

е, и принеси Твоему Сыну и Богу, и о мне, Царице, с небесными вои и с лики святых всех, Ему предложи. В день же судный не забуди мене, и недостойного моего моления, и веры моя, яже к Тебе, и все упование мое возложенное на Тя вспомяни. Утеши оскорбленного мене, и телесное облегчи озлобление, душевныя же болезни и страсти телесныя прежде всех потреби Твоим невидимым предстательством и ходатайством. Да путь маловременнаго сего жития добре и непреткновенно возмогу прейти, и вечная оная благая получу, и славословлю Твое твердое заступление, яко багословена еси, с рождшимся от Тебе Сыном и Богом, ныне и в безконечныя веки. Аминь.

Молитва восьмая

О великий Царю, Вседержителю, милостивый Господи, Иисусе Христе Боже мой! Се на умоление к Тебе аз, многогрешный, предлагаю Матерь Твою Всенепорочную, Пречистую Госпожу, Деву Богородицу и Владычицу всемилостивую, во всем мире молитвенницу за род христианский, Тебе нам рождшую плотию Христа Бога нашего, неизреченныя ради милости Твоя, яже на нас. Тоя убо молитвами, Господи Иисусе Христе, Боже наш, покажи на мне убозем величие, благодать и милость Твою, оставление грехов даруй ми, и сподоби мя быти наследника Царствия Твоего, со всеми святыми, в безконечныя веки веков. Аминь.

Молитва девятая

Пренепорочная Госпоже, небесе и земли Царице, Пречистая Дево Богородице! Смирно припадая молюся Тебе: помози ми, едина многомогущая Владычице, единому грешному, приими недостойное мое моление, и принеси Единородному Твоему Сыну, Богу моему, яко да милостив будет страстней и скорбней души моей; сам бо за множество беззаконий моих не смею простертися и просити прощения, но Тебе предлагаю Ходатаицу и теплую Молитвенницу, яко Матернее к рождшемуся из Тебе Богу имаши дерзновение, и ничтоже Тебе невозможно, аще точию восхощеша. Не презри моих слез, не возгнушайся воздыхания моего, не отрини сердечныя моя болезни, оживи умерщвеннаго мя страстьми. Свет Невечерний возсиявшая нам, душу мою, омраченную злодеяньми просвети; Врача рождшая, уврачуй души моя неисцельныя язвы, волнующагося житейскою бурей, на стезю мя покаяния направи. Приими, Госпоже Всемиловитая, молебную сию службу мою, и человеколюбивому Богу принеси. О прекрасная палата Владычня, сотвори мя дом Божественнаго Духа; Светоносная Сене Небесная, духовную благодать во мне, грешнем, направи. Руце мои недостойныя воздеваю, и сердце и устне скверныя ко хвалению Тебе, Всенепорочная, исправляю, да душетленных мя пакостей избавиши. Всякия нечистыя помыслы от сердца моего отжени, язык мой полезная глаголати исправи, очесем моим подаждь слезы, на омытие скверны греховныя, нозе мои устрой непреткновенно к деланию заповедей Божественных ходити, руце мои соделай к Вышнему на воздеяние благоприятное, слух мой отверзи ко усердному слышанию заповедей Божественнаго Евангелия, яко да и творити я возмогу, Тобою, Всесильная Царице, укрепляемь. И подаждь ми время покаяния, и от внезапныя смерти свободи мя. На кончине же предстани ми, Всемиловитая Мати, в разлучении души от страстнаго моего тела, от воздушных мытарей и князей темных изимающи мя, и рукописание многих грехов моих раздирающи, одесную же блаженнаго стояния на Страшнем суде сподоби мя. Ты свет омраченнаго ума моего, Ты утешение души моей, Ты упокоение спасения моего, Ты едина непостыдная предстательница к Богу. Егоже милостива мне сотвори, Владычице, и присносущных благ наследника яви мя в будущей жизни, идеже есть всех веселящихся жилище. Яко да и тамо Тя, Премилостивая Молитвеннице, сподоблюся величати, и славити велико-

лепое имя Сына Твоего, Христа Спасителя и Бога нашего, со Безначальным Его Отцем, и Всесвятым и Благим и Животворящим Духом, во веки веков. Аминь.

Молитва десятая

О Пресвятая Дево, Мати Господа Вышних сил, Небесе и земли Царице, града и страны наша Всемошная Заступнице! Приими хвалебное пение сие от нас, недостойных раб Твоих, и вознеси молитвы наша ко престолу Бога Сына Твоего, да милостив будет неправдам нашим и пробавит благодать Свою чтущим всечестное имя Твое и с верою и любовью поклоняющимся пречистому образу Твоему. Несмы бо достойни от Него помиловани быти, аще не Ты умилостивиши Его о нас, Владычице, яко вся Тебе от Него возможна суть. Сего ради к Тебе прибегаем, яко к несомненной и скорей Заступнице нашей: услыши нас, молящихся Тебе, удиви над нами великия и богатыя милости Твоя, яви нам небесную помощь Твою и заступление, и испроси у Бога Сына Твоего пастырем нашим ревность и бдение о душах, градоправителем мудрость и силу, судиям правду и нелицеприятие, наставником разум и смиренномудрие, супругом любовь и согласие, чадом послушание, обидимым терпение, обидящим страх Божий, скорбящим благодушие, радующимся воздержание; нам же всем низпосли дух разума и благочестия, дух милосердия и кротости, дух чистоты и правды. Ей, Госпоже Пречистая! Умилосердися на немощныя люди Твоя, рассеянныя собери, заблуждшыя на путь правый настави, недугующия уврачуй, старость поддержи, юныя уцеломудри, младенцы воспитай, и призри на всех нас призрением милостиваго Твоего заступления, воздвигни нас из глубины греховныя и просвети сердечныя очи наша ко зрению спасения. Милостива нам буди зде и на Страшнем суде Сына Твоего; преставльшыися же в вере и покаянии от жития сего отцы и братию нашу в вечней жизни со Ангелы и со всеми святыми жити сотвори. Ты бо еси, Госпоже, слава небесных и упование земных, Ты по Бозе наша надежда и заступница всех притекающих к Тебе с верою. Тебе убо молимся, и Тебе, яко всемогущей помощнице, сами себе и друг друга и всю жизнь нашу предаем, ныне и присно и во веки веков. Аминь.

Молитва одиннадцатая

О Пресвятая Дево, Мати Христа Бога нашего, Царице небесе и земли! Вонми многоболезненному воздыханию душ наших, призри с высоты святя Твоя на нас, с верою и любовью поклоняющихся пречистому и чудотворному образу Твоему. Се бо грехми погружаемии и скорбьми обуреваемии, взирающе на Твой образ, яко живей Тебе сущей с нами, приносим смиренная моления наша. Не имамы бо иныя помощи, ни инаго предстательства, ни утешения, токмо Тебе, о Мати всех скорбящих и обремененных! Помози нам, немощным, утоли скорби наша, настави на путь правый нас, заблуждающих, уврачуй болезненна сердца наша и спаси безнадежных, даруй нам прочее время жития нашего в мире и покаянии проводитьи, подаждь христианскую кончину, и на Страшнем суде Сына Твоего явися нам милосердая Предстательница, да всегда поем, величаем и славим Тя, яко благую Заступницу рода христианскаго, со всеми угодившими Богу, во веки веков. Аминь.

Молитва двенадцатая

О Пресвятая Дево, Мати Господа Вышняго, Заступнице и Покрове всех к Тебе прибегающих! Призри с высоты святя Твоя на мя, грешнаго, припадающаго ко пречистому и чудотворному образу Твоему, услыши мою теплую молитву и принеси ю пред возлюбленнаго Сына Твоего, Господа нашего Иисуса Христа, умоли Его, да озарит мрачную душу мою светом божественныя благодати Своея, да избавит мя от всякия нужды, скорби и болезни, да

низпослет мне тихое и мирное житие, здравие телесное и душевное, да умирит страждущее сердце мое и исцелит раны его, да наставит мя на добрая дела, ум мой убо от помышлений суетных да очистит, исполнению же заповедей Своих мя научив, от вечных муки да избавит и Своего Небеснаго Царствия да не лишит мя. О Пресвятая Богородице! Ты, всех скорбящих Радосте, услыши и мя, скорбнаго; Ты, именуемая Утоление печали, утоли и мою печаль; Ты, ^пино неопалимая, сохрани мир и всех нас от вредоносных огненных стрел врага; Ты, Взыскание погибших, не попусти и мне погибнуть в бездне грехов моих, на Тя бо по Бозе вся моя надежда и упование. Буди мне в жизни временней Заступница и о жизни вечней пред возлюбленным Сыном Твоим, Господем нашим Иисусом Христом Ходатаица. Научи мя Тому убо с верою и любовью служить, Тебе же, Пресвятая Мати Божия, Препоблагословенная Марие, благоговейно чтити до скончания дней моих. Аминь.

Молитва тринадцатая

О Пресвятая Госпоже Владычице Богородице! Приими недостойную молитву нашу, и сохрани нас от навета злых человек и от внезапныя смерти, и даруй нам прежде конца покаяние. На моление наше умиласердися, и радость вместо печали даруй. И избави нас, Госпоже, от всякия беды и напасти, скорби, и болезни, и от всякаго зла. И сподоби ны, грешныя рабы

Конец ознакомительного фрагмента.

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.